



Proxecto de orde do... de... de 2017 pola que se establecen as bases e os criterios para a elaboración dos regulamentos electorais que deben rexer a realización dos procesos electorais nas federacións deportivas galegas.

Texto do 13 de setembro de 2017

A Lei 3/2012, do 2 de abril, do deporte de Galicia, establece o marco xurídico para o desenvolvemento da política deportiva da Comunidade Autónoma de Galicia

O apartado 6 do artigo 58 da Lei do Deporte de Galicia preveu que o mandato dos membros da asemblea xeral e da presidenta ou do presidente das federacións deportivas galegas fora de catro anos, período que se establece con carácter xeral para a renovación dos órganos de gobernos colexiados, e establece a previsión de que esa renovación deberá levarse a cabo nos anos nos que teñan lugar os Xogos Olímpicos de Inverno.

Dispónse tamén que as federacións deportivas galegas desenvolverán os procesos electorais para a elección dos seus órganos de goberno e de representación de acordo cos seus respectivos regulamentos electorais, que deberán axustarse ao disposto na normativa que para tal efecto estableza a administración autonómica.

Esta orde estrutúrase en doce capítulos, cun total de 53 artigos, catro disposicións adicionais, dúas disposicións derogatorias e dúas disposicións derradeiras.

O capítulo I, das disposicións xerais, establece o obxecto e o ámbito de aplicación da presente norma que pretende regular tanto o proceso electoral do ano 2018 como as futuras eleccións das federacións deportivas galegas.

O capítulo II, dos órganos electorais, regula os órganos federativos que interveñen no proceso electoral. Por unha banda, a comisión xestora da federación como órgano encargado de administrar e xestionar a Federación durante o proceso electoral, que ten a obriga de transparencia na súa actuación e neutralidade ante as distintas candidaturas. Por outra, a Xunta electoral única que configúrase como o órgano de ordenación e de control das eleccións e cuxo mandato se estende ata o seguinte proceso electoral.

O capítulo III, dos electores e elixibles, establece as condicións esixidas para ser elector e elixible. A principal condición para se elector e elixible á asemblea xeral é a de ter licenza federativa dende o un de xaneiro do ano anterior ao ano da elección, no caso dos clubs dous anos, e ter participado nunha competición oficial. E isto co obxecto de facilitar o voto ao maior número de electores. Poderá presentarse á presidencia dunha federación deportiva calquera persoa sempre que veña avalada polo 10% dos vogais da asemblea xeral.

No capítulo IV, dos censos electorais, regúlanse os tipos e o proceso de elaboración, aprobación e publicación dos censos electorais. Establécense tres clases de censos: o provisional, o definitivo e como novidade o inicial que permitirá, tanto á Federación deportiva como aos electores, corrixir os posibles fallos que poidan existir no censo electoral e minimizar as posibles reclamacións ao mesmo.



O capítulo V, do proceso electoral, describe o proceso electoral que comenza coa publicación da súa convocatoria que é potestade da presidencia da federación, e que debe realizarse, ineludiblemente, no primeiro trimestre do ano electoral co obxecto de que todos os procesos electorais estean rematados no mesmo ano natural en que se inicien. En caso de que non se convoquen as eleccións nese prazo, a Secretaría Xeral para o Deporte procederá de oficio a convocalas. O regulamento electoral que aproba a asemblea xeral constitúe a norma que vai a regular o proceso electoral de cada federación. Para unha mellor análise do regulamento electoral as federacións deberán expor o regulamento electoral aos asembleístas e remitir á Secretaría Xeral para o Deporte o texto do regulamento electoral e as alegacións feitas polos asembleístas. O regulamento electoral deberá ser aprobado previamente á súa aplicación pola Secretaría Xeral para o Deporte e a súa aprobación non poderá impugnarse ante o Comité Galego de Xustiza Deportiva.

No capítulo VI, das mesas electorais, regúlanse os tres tipos de mesas electorais que van a existir neste proceso electoral. A mesa electoral para a votación a candidatos á asemblea xeral; a mesa electoral de voto por correo que, para todas as federacións, terá a súa sede na Secretaría Xeral para o Deporte e na que formará parte como vogal da mesma un empregado público designado pola persoa responsable da Secretaría Xeral para o Deporte; e a mesa electoral para a votación á presidencia de cada federación que se ten que constituír no día de votación.

O capítulo VII, do sistema de elección a membros da asemblea xeral, define o sistema de elección a membros da asemblea xeral; o sistema de votación elixido é o de listaxes abertas. Tamén se regula a composición da asemblea xeral na que deben estar representados todos os estamento deportivos da federación e todas as especialidades deportivas recoñecidas nos seus estatutos federativos é respectando a proporcionalidade de acordo cuns porcentaxes dándosele máis peso aos clubs deportivos pola súa maior implicación nos aspectos organizativos e federativos. A novidade nesta materia é que por primeira vez reservase unha porcentaxe mínima do 10% dos representantes do estamento aos deportistas galegos de alto nivel de cada federación. A xunta electoral, aprobado o censo definitivo, fixará o número concreto de membros de cada estamento.

O capítulo VIII, da elección do/a presidente da federación, regula a elección a presidente da federación, establecendo que poderán ser candidatos aqueles que presenten avais do 10% dos vogais da asemblea xeral.

No capítulo IX, da xornada electoral, establécense as condicións e as formalidades que se deben cumprir no desenvolvemento da xornada electoral, na constitución das mesas electorais, nas votacións, no escrutinio dos votos así como a documentación electoral e o voto por correspondencia.

No capítulo X, da moción de censura, regúlase a moción da censura como un proceso electoral específico de elección do presidente dunha federación deportiva galega que pode ter lugar durante o mandato electoral. Trátase dunha moción de censura construtiva que require para a súa aprobación que sexa votada favorablemente pola maioría absoluta dos membros da asemblea xeral

No capítulo XI, da Comisión delegada, defínense as peculiaridades da elección dos membros da Comisión Delegada para aquelas federacións deportivas galegas que as teñan previstas nos seus estatutos.

O capítulo XII, do réxime de reclamacións e recursos, regula o réxime de reclamacións e recursos que poden ter lugar no proceso electoral distinguindo entre as reclamacións ante a xunta electoral e o recurso ante o Comité Galego de Xustiza Deportiva.



En consecuencia, en virtude das facultades que me confire o artigo 34.6 da Lei 1/1983, do 22 de febreiro, reguladora da Xunta e da súa Presidencia, DISPOÑO:

Capítulo I. Das disposicións xerais

Artigo 1. Obxecto e ámbito de aplicación.

1. Esta orde ten como obxecto regular o procedemento electoral para a renovación dos órganos de goberno das federacións deportivas galegas.
2. As disposicións contidas nesta orde serán de aplicación ás federacións deportivas galegas inscritas no Rexistro de Entidades Deportivas Galegas no desenvolvemento dos seus procesos electorais para a elección dos seus órganos de goberno e representación de acordo cos seus respectivos regulamentos electorais que deberán axustarse ao disposto nesta normativa.

Capítulo II. Dos órganos electorais

Sección 1ª Da comisión xestora

Artigo 2. Comisión Xestora.

Unha vez convocadas as novas eleccións, a Xunta Directiva da federación deportiva entenderase disolta, asumindo as súas funcións unha Comisión Xestora.

Artigo 3. Da composición e duración da comisión xestora.

1. A composición da Comisión xestora, cun número máximo de 8 membros máis un Presidente, será a seguinte:
 - a) Catro membros elixidos pola Comisión Delegada ou, en caso de non existir esta, pola Asemblea Xeral, debendo ter representación cada un dos estamentos representados nela.
 - b) Un número máximo de catro membros designados pola Xunta Directiva antes da súa disolución ou, no seu caso, polo Presidente da Federación, entre os que se deberán incluír os que exerza as funcións de secretario e tesoureiro da Federación deportiva galega.
 - c) A Presidencia da Comisión xestora corresponderá a quen presida a Federación galega ou, cando cese en dita condición cando finalice o seu mandato, cando renuncie ao posto, cando prospere unha moción de censura ou cando presente a candidatura, a quen sexa elixido para tal función por e de entre os que integren a Comisión xestora.
2. Os que presenten a súa candidatura para formar parte dos órganos de goberno e representación da correspondente Federación non poderán ser membros da Comisión xestora, debendo cesar en dita condición ó presentar a candidatura en cuestión.
3. A comisión xestora entenderase extinguida unha vez tomen posesión todos os membros dos órganos de goberno da federación deportiva.

Artigo 4. Das funcións da comisión xestora.

1. A Comisión xestora será o órgano encargado de administrar e xestionar a Federación durante o proceso electoral, non poderán realizar actos que directa ou indirectamente, mediata ou



inmediatamente, induzan ou condicionen o sentido do voto dos electores, e deberán observar os principios de obxectividade, transparencia do proceso electoral e igualdade entre os actores electorais. Estas previsións serán aplicables á actividade desenvolvida polo persoal da Federación e polos restantes órganos federativos durante o proceso electoral.

2. Se por circunstancias ou incidencias surxidas durante o proceso electoral a finalización do mesmo se demorase en exceso, dificultando, comprometendo ou poñendo en risco o desenvolvemento ordinario da actividade deportiva da Federación deportiva galega, a Comisión xestora, coa supervisión e autorización da Secretaría Xeral para o Deporte, poderá adoptar as medidas imprescindibles para evitar dita situación.

Sección 2ª Da xunta electoral

Artigo 5. A xunta electoral.

Constituirase unha única xunta electoral en cada federación deportiva galega que será o órgano de ordenación e de control das eleccións. Deberá resolver en primeira instancia as reclamacións que se presenten contra toda decisión adoptada no proceso electoral, agás a convocatoria das eleccións e a adopción do acordo polo que se aproba o regulamento electoral que unicamente poderá ser obxecto de recurso directamente ante o Comité Galego de Xustiza Deportiva.

Artigo 6. Da composición e duración da xunta electoral.

1 A xunta electoral estará integrada por tres membros titulares e tres suplentes.

2. Serán designados pola asemblea xeral na mesma sesión na que se aproba o regulamento electoral, e na forma prevista nos estatutos, entre as persoas que presenten a súa candidatura a membros da xunta electoral. De non existir candidatos, serán designados pola Comisión Delegada, e de non existir esta pola Comisión xestora, no prazo de tres días hábiles dende a celebración de dita asemblea.

3. O Regulamento Electoral determinará o seu réxime de incompatibilidades, a súa forma de constitución, competencias, regras de funcionamento, sede e réxime de publicidade dos acordos que adopte.

4. Os candidatos e candidatas a membros da xunta electoral deberán reunir os seguintes requisitos:

a) Ser maior de 18 anos.

b) Ter o título de bacharelato ou equivalente.

c) Non formar parte dos órganos de goberno da federación, nin da comisión xestora nin ostentar postos directivos na federación. No suposto de presentarse como candidato a membro da Asemblea xeral ou á presidencia da federación cesará no seu posto na xunta electoral e será substituído polo suplente.

d) Non estar cumprindo sanción disciplinaria firme ou sanción administrativa firme en materia deportiva que comporte sanción de inhabilitación para ocupar cargos nunha organización deportiva.

e) Aceptar expresamente o cargo de membro da xunta electoral.



5. Poderán ser candidatos a membros da xunta electoral persoas que non teñan a condición de federado ou de membro da asemblea.
6. No caso de non presentarse candidatos a membros da xunta electoral, actuarase de conformidade co disposto no punto 2 deste artigo.
7. Os membros da Xunta electoral elixirán entre eles ás persoas que desempeñarán a presidencia e a secretaría da mesma. No seu defecto, ostentará a presidencia da xunta electoral o membro elixido de entre eles de maior idade e a secretaría o de menor idade.
8. A xunta electoral constituirase no prazo máximo de dous días desde a data da convocatoria do proceso electoral.
9. Ao día seguinte da constitución da xunta electoral, o/a secretario/a desta enviará á Secretaría Xeral para o Deporte a relación de persoas que constitúen a xunta electoral.
10. O mandato dos membros da Xunta Electoral terá unha duración de catro anos, e as eventuais vacantes que se produzan serán cubertas polo mesmo procedemento.

Artigo 7. Das funcións da Xunta Electoral.

1. Son funcións da xunta electoral:
 - a) Velar polo axustamento a dereito do proceso electoral dos órganos de goberno e representación federativos.
 - b) Organizar o proceso electoral para a asemblea xeral e a presidencia da federación, segundo o disposto no regulamento electoral.
 - c) Designar as mesas electorais de conformidade co previsto no regulamento electoral.
 - d) Aprobar as candidaturas que reúnan os requisitos esixidos, así como o resto da documentación electoral.
 - e) Garantir a exposición dos censos, candidaturas e outros documentos segundo se estableza no regulamento electoral.
 - f) Coñecer e pronunciarse, en primeira instancia, sobre as reclamacións que se presenten en materia electoral. A xunta electoral esta obrigada a resolver expresamente e no prazo concedido ao efecto todas as reclamacións que se formulen.
 - g) Custodiar a documentación correspondente a todo o proceso electoral, excepto o que non lle corresponda do procedemento do voto por correo, ata a súa finalización que será cando remate o prazo para a impugnación da toma de posesión da presidencia da federación.
 - h) En xeral, cantas facultades lle sexan atribuídas pola presente orde e polo regulamento electoral de aplicación.
2. As decisións da xunta electoral tomaranse por maioría de votos, non sendo admisible a abstención.
3. A asistencia á xunta electoral é obrigatoria salvo ausencia xustificada.

Capítulo III. Dos electores e elixibles



Artigo 8. Electores e elixibles á Asemblea xeral.

1. Poderán ser electores e elixibles á asemblea xeral:

a) No caso dos estamentos constituídos por deportistas e técnicos/adestradores, os que reúnan os seguintes requisitos:

- Ser maior de idade na data de celebración das votacións.
- Ter nacido en Galicia ou veciñanza administrativa galega.
- Ter licenza federativa en vigor na data de convocatoria das eleccións e dende xaneiro do ano anterior ao da celebración das eleccións.
- Ter participado, dende xaneiro do ano anterior ao da celebración das eleccións, nunha competición oficial celebrada en Galicia cada tempada.

Nas modalidades ou especialidades deportivas nas que a actividade deportiva non teña carácter competitivo, é suficiente con ter licenza federativa en vigor na data de convocatoria das eleccións e xaneiro do ano anterior ao da celebración das eleccións.

As federacións nas que por causa de forza maior non puidesen desenvolver competicións ou actividades deportivas no período indicado anteriormente deberán atender ao último calendario oficial desenvolvido.

b) No estamento de entidades deportivas, as que reúnan os seguintes requisitos:

- Entidades que figuren inscritas, dende xaneiro dos dous anos anteriores ao ano de celebración das eleccións, na federación correspondente e no Rexistro de Entidades Deportivas de Galicia.
- Que teñan participado, dende xaneiro dos dous anos anteriores ao ano de celebración das eleccións, como mínimo, nunha competición oficial en Galicia cada tempada
- As federacións e as especialidades deportivas que, por causa de forza maior, non puidesen desenvolver competicións ou actividades deportivas no período indicado anteriormente deberán atender ao último calendario oficial desenvolvido.

c) No caso dos estamentos constituídos por árbitros e xuíces, os que reúnan os seguintes requisitos:

- Ser maior de idade na data de celebración das votacións.
- Ter nacido en Galicia ou veciñanza administrativa galega
- Ter licenza federativa en vigor na data de convocatoria das eleccións e dende xaneiro do ano anterior ao da celebración das eleccións.

2. Para os efectos deste artigo entenderase como competición deportiva oficial de ámbito autonómico as cualificadas, organizadas e incluídas como tales no calendario oficial das respectivas Federacións Deportivas de Galicia ou pola Secretaría Xeral para o Deporte dentro do seu ámbito competencial. Tamén se considerarán as competicións estatais e internacionais oficiais da federación española ou internacional ás que a federación deportiva galega esté adscrita.



3. Os membros de cada federación que pertencen a dous ou máis estamentos ou a dous ou mais especialidades deportivas deberán optar por unha delas mediante escrito dirixido á xunta electoral, que deberá cursarse no período de reclamacións ao censo provisional. O regulamento electoral deberá especificar os criterios para identificar ós electores nun único estamento no caso de non exercitarse a opción individual.

4. Poderán ter a condición de electores e elixibles todas aquelas persoas físicas e xurídicas que tendo sido sancionadas, a sanción non conleve expresamente a inhabilitación para ser elector ou elixible.

5. Aos efectos da presente orde, a licenza federativa única terá a mesma validez que a licenza federativa galega. Neste caso, os electores e elixibles deberán presentar declaración xurada ante a xunta electoral pola que renuncia a participar en outros procesos electorais a outras federacións deportivas autonómicas.

Artigo 9. Dos electores e elixibles á presidencia da Federación e á comisión delegada.

Poderán ser electores á Presidencia da Federación e á comisión delegada os membros da asemblea xeral elixidos en cada proceso electoral

Poderán ser elixibles para a presidencia da federación calquera persoa que presente unha candidatura, sexa ou non membro da asemblea xeral ou da federación deportiva, sempre que a súa candidatura sexa avalada polo 10% dos vogais da asemblea xeral.

Só poderán ser elixibles para a comisión delegada os que teñan a condición de membro da asemblea xeral

Capítulo IV. Dos censos electorais.

Artigo 10. Das clases de censos electorais.

1, No proceso electoral de renovación dos órganos de goberno das federacións deportiva galegas elaboraranse tres censos electorais:

a)Censo inicial

b)Censo provisional.

c)Censo definitivo.

2.Os censos electorais deberán ser elaborados e aprobados por cada federación.

Artigo 11. Do contido do censo electoral.

1. O censo electoral estará ordenado alfabeticamente por apelidos e nome e, de selo caso, en listas separadas por especialidades deportivas e polos distintos estamentos deportivos de cada federación.

2. No censo electoral incluíranse os seguintes datos:

a) Deportistas, técnicos, xuíces e árbitros: Nome, apelidos, enderezo, número de licenza federativa, número de DNI, de pasaporte ou, no seu caso, de autorización de residencia, club de pertenza e consideración de deportistas de alto nivel e cando así proceda especialidade deportiva.



No caso dos deportistas e técnicos, o enderezo a estes efectos será o do seu club, ou o que estes indiquen ao efecto.

b) Clubs, seccións ou entidades deportivas : Nome, denominación ou razón social, enderezo, número de inscrición no Rexistro de Entidades Deportivas de Galicia, identificación do representante legal que exercerá o dereito a voto, e cando así proceda especialidade deportiva.

c) En relación con outros colectivos interesados, se os houbera: Os dos anteriores apartados que lles sexan de aplicación segundo sexan persoas físicas ou xurídicas.

3. O tratamento e publicación dos datos contidos no censo terá por exclusiva finalidade garantir o exercicio polos electores do seu dereito de sufraxio, e garantir a transparencia do proceso electoral, non sendo posible a súa utilización nin cesión para ningunha finalidade distinta daquela. Queda prohibida calquera información particularizada sobre os datos persoais contidos no Censo Electoral. En todo caso, será de aplicación o previsto na Lei Orgánica 15/1999, de 13 de decembro, de Protección de Datos de Carácter Persoal.

Artigo 12. Do censo electoral inicial.

1. Cada Federación elaborará, no prazo máximo de dous meses dende a publicación da presente orde, un censo electoral inicial por cada estamento: clubs, deportistas, técnicos, xuíces e árbitros e, no seu caso, outros colectivos previstos nos seus estatutos.

2. Este censo electoral inicial será exposto publicamente no taboleiro de anuncios da Federación e nas súas delegacións así como na paxina web da Federación nunha sección denominada “procesos electorais”, durante 20 días naturais, aos efectos de que os posibles electores poidan presentar aclaracións, rectificacións ou reclamacións ao mesmo durante dito prazo, mediante escrito remitido á xunta directiva, que valorará os escritos presentados procedendo, no seu caso, a emenda ou corrección do censo electoral inicial no prazo de 8 días naturais.

3. Rematado este prazo, remitirase o censo electoral inicial xunto coas aclaracións, rectificacións ou reclamacións á Secretaría Xeral para o Deporte, no prazo de 10 días e en soporte informático apto para tratamento de textos e datos, e irá acompañado dunha relación das competicións oficiais de acordo cos calendarios deportivos oficiais aprobados da tempada do ano no que se celebran as eleccións e a do ano anterior.

4. A Secretaría Xeral para o Deporte, recibida a documentación anterior comprobará que as entidades deportivas figuran inscritas no Rexistro de Entidades Deportivas de Galicia e que as competicións oficiais están incluídas no calendario deportivo oficial. No caso de que as entidades non figuren inscritas ou as competicións non estean incluídas no calendario deportivo oficial, emitirá un certificado no prazo de dez días facendo constar esta circunstancia.

Artigo 13. Do censo electoral provisional.

1. A xunta directiva, a vista do certificado da Secretaría Xeral para o Deporte, deberá dar de baixa no censo electoral inicial ás entidades deportivas galegas non inscritas, así como non terá en consideración as competicións non incluídas no calendario deportivo oficial, formulando un censo electoral provisional.



2. O censo electoral provisional publicarase simultaneamente coa convocatoria electoral e deberá ser remitido polo secretario da federación á xunta electoral no prazo máximo de catro días desde a convocatoria.

3. O censo electoral provisional será exposto publicamente no taboleiro de anuncios da federación e das delegacións territoriais, de habelas, así como na páxina web da federación nunha sección denominada “procesos electorais” ou, de non tela, na da Secretaría Xeral para o Deporte por un prazo mínimo de 10 días, dentro do cal se poderán presentar as reclamacións que se consideren oportunas ante a xunta electoral.

4. Rematado o prazo de exposición pública, a xunta electoral resolverá as reclamacións expresamente no prazo de 5 días. Transcorrido ese prazo sen resolución expresa, entenderase desestimada a reclamación formulada.

5. Contra a resolución das reclamacións ao censo electoral provisional poderá interpoñerse, nun prazo máximo de dous días a contar desde a recepción da notificación da resolución da reclamación ou transcorrido o prazo máximo para resolver, recurso ante o Comité Galego de Xustiza Deportiva que deberá resolvelo nun prazo de cinco días.

Artigo 14. Do censo electoral definitivo.

1. Unha vez resoltos os recursos, no caso de terse presentado, ou de non existir estes, o censo electoral provisional pasará a ser definitivo, sen que caiba impugnación posterior.

2. O censo definitivo será exposto nos mesmos lugares e da mesma forma que os censos provisionais e será exposto ata o día da votación á asemblea xeral.

3. De conformidade co previsto no artigo 34.4 da presente Orde, corresponde á Xunta electoral aprobar os cambios que deban ser feitos na distribución inicial do número de representantes asignado a cada circunscrición por especialidade e por estamento, cando ditos cambios veñan impostos polas variacións ou modificacións do censo electoral provisional. Contra a resolución da Xunta Electoral poderá interpoñerse, no prazo de cinco días, recurso ante o Comité Galego de Xustiza Deportiva.

4. Unha vez rematado o período para solicitar o exercicio de voto por correo e sendo definitivo os electores que foron autorizados para exercer o voto por correo, o censo definitivo dividirase en dúas seccións, unha na que figuren os electores que non solicitaron o voto por correo e outra nun censo especial de voto por correo. En ningún caso poderá figurar un elector nas dúas seccións do censo electoral definitivo.

Capítulo V. Do proceso electoral

Sección 1ª. Da convocatoria

Artigo 15. Convocatoria.

1. Por medio de acordo da persoa titular da presidencia de cada federación deportiva galega, realizarase a convocatoria para a renovación dos órganos de goberno da federación.

2. A convocatoria de eleccións e o calendario electoral estimado se comunicarán á Secretaría Xeral para o Deporte.



3. A convocatoria de eleccións deberá realizarse no primeiro trimestre do ano no que teñan lugar os Xogos Olímpicos de Inverno e deberá establecer como data límite de toma de posesión dos novos membros electos dos órganos de representación e goberno de cada federación deportiva o 31 de decembro dese ano, respectando en todo caso os catro anos máximos de mandato establecidos no artigo 58.6 da Lei 3/2012, do 2 de abril, do deporte de Galicia.

4. A convocatoria do proceso electoral, que se publicará no taboleiro de anuncios da sede da federación e nas delegacións territoriais, se as houbera, así como na páxina web da respectiva federación, tanto na páxina principal como na sección «procesos electorais» e na páxina web da Secretaría Xeral para o Deporte, no caso de que a federación non dispoña dela, deberá conter cantos datos se precisen para o correcto desenvolvemento do proceso electoral, e concretamente:

a) O calendario electoral.

b) O censo electoral provisional.

c) A distribución do número de membros da Asemblea Xeral por especialidades, estamentos y circunscricións electorais que deberá reflectir a distribución inicial establecida no Regulamento electoral do número de representantes asignado a cada circunscrición por especialidade e por estamento.

d) A data de celebración e o horario das votacións.

e) Os modelos oficiais de sobres e papeletas de acordo co anexo I da presente orde.

f) O regulamento electoral.

g) O procedemento e os prazos para o exercicio do voto por correo.

h) A forma de remisión da documentación á xunta electoral.

i) A composición nominal da Xunta Electoral e os prazos para a súa recusación, así como o enderezo, número de fax e enderezo electrónico da xunta electoral.

5. A convocatoria deberá ser obxecto da máxima publicidade e difusión posibles, utilizando todos os medios electrónicos, telemáticos e informáticos dos que dispoña a Federación deportiva galega. En calquera comunicación que se faga por este medio deixarase constancia, mediante os procedementos que procedan, da data da exposición ou comunicación

Esta publicación será avalada, mediante certificación do Secretario/a Xeral da Federación deportiva galega e será exposta xunto coa documentación anterior.

6. O acto da convocatoria poderá ser recorrido ante o Comité Galego de Xustiza Deportiva nun prazo de cinco días hábiles desde a data da súa completa publicación.

7. No suposto de que unha federación deportiva galega non proceda á convocatoria de eleccións no prazo establecido no punto 3 deste artigo, a Secretaría Xeral para o Deporte procederá a convocar eleccións aos órganos de goberno e representación de dita federación e nomeará, á vez, unha comisión xestora específica para organizar e dirixir o proceso electoral.

Sección 2ª. Do regulamento electoral



Artigo 16. Do regulamento electoral.

O regulamento electoral é o conxunto de normas que regula a celebración do proceso electoral de cada federación deportiva galega. O regulamento electoral elaborárase conforme ao procedemento previsto nos estatutos de cada federación; o seu contido axustarase ao disposto na presente norma.

Artigo 17. Da aprobación do regulamento electoral.

1. O regulamento electoral deberá ser aprobado pola asemblea xeral convocada ao efecto. Esta asemblea xeral deberá ser convocada cun prazo de antelación mínimo de 10 días naturais e o proxecto de regulamento electoral se notificará a todos os asembleístas con esa antelación e publicado de xeito destacado na paxina web da federación deportiva na sección “procesos electorais” coa finalidade de que poidan formular as alegacións que estimen convenientes.

2. Aprobado o regulamento electoral pola asemblea xeral deberá ser remitido no prazo de dous días, xunto coa acta da asemblea na que se recollan as alegacións formuladas e unha proposta de calendario electoral que indicará as datas estimadas de inicio e remate do proceso electoral, á Secretaría Xeral para o Deporte para a súa análise e a súa aprobación definitiva. Esta remisión realizarase cunha antelación mínima de 45 días á data prevista para o inicio do proceso electoral.

3. A Secretaría Xeral para o Deporte resolverá, no prazo máximo dun mes, desde a entrada do regulamento no seu rexistro, sobre a súa aprobación ou a súa devolución para a emenda daquelas normas do regulamento que non se axusten ao disposto na presente orde. Neste último suposto, indicaranse estas e concederanse dez días hábiles para proceder á dita emenda. Transcorrido un mes sen que a Secretaría Xeral para o Deporte dite ningunha resolución se entenderá aprobado o regulamento.

4. No suposto de que sexa necesario proceder á emendas do regulamento electoral, é potestativo de cada federación, e sempre que así se acorde expresamente na asemblea xeral que aprobe o regulamento electoral, a convocatoria dunha nova asemblea xeral para a aprobación do regulamento electoral coas modificacións indicadas pola Secretaría Xeral para o Deporte, ou ben a delegación na xunta directiva ou no presidente ou presidenta da federación deportiva a facultade de realización e aprobación das modificacións indicadas sen necesidade de novo sometemento á aprobación da asemblea xeral. Realizadas as modificacións, o novo regulamento remitirase á Secretaría Xeral para o Deporte para a súa aprobación definitiva.

5. Calquera procedemento electoral iniciado en base a un regulamento electoral non aprobado pola Secretaría Xeral para o Deporte será nulo de pleno dereito.

6. A resolución aprobatoria do regulamento electoral pola Secretaría Xeral para o Deporte esgotará a vía administrativa e unicamente poderá ser obxecto de recurso contencioso administrativo. Non obstante, poderase impugnar ante o Comité Galego de Xustiza Deportiva a convocatoria da asemblea xeral e a adopción do acordo polo que se aproba o regulamento electoral de acordo cos seus respectivos estatutos. En ningún caso poderase impugnar ante o Comité Galego de Xustiza Deportiva o contido do regulamento.

Artigo 18. Do contido do regulamento electoral.

1. O regulamento electoral regulará, como mínimo, as seguintes cuestións:



- a) O calendario electoral e os prazos do proceso electoral.
- b) Os requisitos, os prazos, a forma de presentación e de proclamación das candidaturas electorais.
- c) Os procedementos de desempate.
- d) O horario de apertura ós electores da sede federativa e daquelas outras sedes habilitadas ao efecto.
- e) A localización e o horario da mesa ou mesas electorais. No caso de existiren varias mesas electorais, a federación deberá sinalar unha única mesa para a recepción dos votos por correo.
- f) As competencias e o funcionamento da xunta electoral e da mesa ou mesas electorais; así como o lugar, data e hora de realización do sorteo, que será público, para a constitución destas últimas.
- g) A regulación do voto por correo.
- h) O número concreto de membros da asemblea xeral e, no seu caso, as circunscricións electorais e os criterios de distribución entre elas para elixir aos membros da asemblea xeral, debendo efectuar unha distribución inicial do número de representantes asignado a cada circunscrición por especialidade deportiva e por estamento. Esta distribución inicial poderá modificarse pola xunta electoral unha vez aprobado definitivamente o censo electoral.
- i) O sistema de elección dos membros da asemblea xeral.
- j) O sistema de elección do presidente da federación, e as normas relativas ao desenvolvemento da moción de censura.
- k) O número de membros e o sistema de elección da comisión delegada, de estar prevista nos estatutos da respectiva Federación.
- l) O procedemento de resolución das reclamacións electorais: lexitimación, prazo de interposición e prazo de resolución.
- m) O sistema, o procedemento e os prazos para a substitución dos membros da asemblea xeral que perdan a condición pola que foron elixidos.
- n) No seu caso, a forma e as condicións de realización de eleccións parciais para cubrir as posibles vacantes que se produzan na asemblea xeral.
- ñ) Os modelos de sobres e papeletas.

2. O secretario da federación deportiva e/ou o secretario da xunta electoral garantirán a exposición do regulamento electoral aprobado pola Secretaría Xeral para o Deporte no taboleiro de anuncios da federación e as súas delegacións, durante o desenvolvemento de todo o proceso electoral

Sección 3ª. Do calendario electoral

Artigo 19. Calendario electoral.

- 1. O calendario electoral para a elección dos membros dos órganos reitores das federacións respectará os prazos, obrigas e prohibicións establecidos na presente orde.



2. O calendario electoral se publicará como anexo ao acordo da convocatoria do proceso electoral.

3. Os prazos deste calendario para a presentación de escritos, reclamacións e recursos, cando estean sinalados por días, entenderanse días naturais e expirarán ás 14.00 horas do derradeiro día de prazo, salvo disposición en contrario. Se o día final do prazo coincide con domingo ou con día festivo de carácter autonómico ou estatal, entenderase que remata o día laborable inmediato seguinte.

Sección 4ª. Das circunscricións electorais

Artigo 20. Circunscricións electorais.

1. A circunscrición electoral poderá ser de ámbito territorial autonómico ou de ámbito territorial provincial.

2. A circunscrición electoral para elixir ós representantes das entidades deportivas na Asemblea xeral poderá ser a autonómica ou provincial.

3. A circunscrición electoral para elixir ós membros do estamento de deportistas será a autonómica ou provincial.

4. A circunscrición electoral para técnicos, xuíces e árbitros e, no seu caso, outros colectivos interesados será a autonómica.

5- Excepcionalmente, e cando así estea previsto nos estatutos federativos, poderán establecerse circunscricións electorais territorialmente inferiores á provincia.

6. En ningún proceso electoral admitiranse tres niveis de circunscrición electoral.

Sección 5ª. Da campaña electoral

Artigo 21. Da campaña electoral.

1. Para os efectos desta orde, enténdese por campaña electoral o conxunto de actividades lícitas levadas a cabo polos/as candidatos/as encamiñadas á captación de sufraxios.

2. A campaña electoral iniciarase ás 00.00 horas do día posterior á proclamación definitiva de candidaturas e rematará ás 00.00 horas do día inmediatamente anterior á data fixada para a votación; desde este momento non se poderá realizar propaganda algunha en favor de ningunha candidatura.

Artigo 22. Papeletas e sobres.

1. As papeletas dos/das candidatos/as e os sobres de votación serán facilitados, en número suficiente, pola xunta electoral de cada federación á mesa electoral correspondente.

2. As papeletas confeccionaranse en cores diferentes para cada estamento que vaia obter representación na asemblea xeral.

Capítulo VI. Das mesas electorais

Sección 1ª Das mesas electorais

Artigo 23. Das mesas electorais.



Para a celebración das votacións constituiranse tres tipos de mesa electoral:

- a) Mesa electoral para a votación a candidatos da asemblea xeral de cada federación deportiva.
- b) Mesa electoral de voto por correo
- c) Mesa electoral para a votación á presidencia de cada federación.

Sección 2ª. Da mesa electoral para a votación a candidatos da asemblea xeral.

Artigo 24. Da mesa electoral para a votación a candidatos da asemblea xeral.

1. A mesa electoral para a votación aos candidatos da asemblea xeral constituirase en cada circunscrición electoral e no lugar que se determine no regulamento electoral.
2. A mesa electoral de cada circunscrición está composta por tres membros titulares: un presidente, un secretario e un vogal; e tres suplentes destes. Estes serán elixidos por sorteo pola xunta electoral entre os integrantes do censo definitivo, conforme o disposto no regulamento electoral.
3. Ocuparán a presidencia e a secretaría da mesa electoral os membros de maior e menor idade, respectivamente.
4. A asistencia á mesa electoral é obrigatoria salvo causa xustificada que deberá ser autorizada pola xunta electoral.
5. A designación dos membros titulares e suplentes da mesa electoral realizarase nos dous días seguintes ao da proclamación definitiva das candidaturas. As persoas propostas deberán aceptar esta designación no prazo dos dous días seguintes, agás causa xustificada e documentada que lles impida a aceptación do cargo.
6. Non poderán formar parte da mesa electoral os candidatos á elección de membros da asemblea xeral.
7. Unha vez constituídos todos os órganos reitores da federación entenderanse disoltas as mesas electorais.

Artigo 25. Das funcións da mesa electoral.

As funcións das mesas electorais para a votación dos candidatos da asemblea xeral serán as seguintes:

- Comprobar a identidade dos votantes.
- Recoller a papeleta de voto e depositala na urna pechada e preparada para os efectos.
- Proceder á contaxe de votos.
- Levantar acta dos votos emitidos, resultados e calquera outra incidencia, así como das incidencias e reclamacións, se as houber, facendo constar o número de votos obtidos por cada candidato.
- Remitir á Xunta electoral e a Secretaría Xeral para o Deporte a documentación esixida na presente orde e no regulamento electoral



Artigo 26. Dos interventores nas mesas de candidatos a membros da asemblea xeral.

Para cada mesa electoral, os candidatos poden nomear interventores da súa candidatura a calquera persoa maior de idade que serán identificados ante a xunta electoral cunha antelación non inferior a 3 días do día de realización das respectivas votacións. Correspóndelle á xunta electoral expedir a correspondente acreditación como interventor.

As persoas interventoras poderán participar nas deliberacións da mesa, con voz pero sen voto, así como solicitarlle certificacións e formularlle protestas, todo iso sen prexuízo da lexitimación que lles corresponde conforme os artigos 48 e 50 desta orde.

Sección 3ª Da mesa electoral de voto por correo

Artigo 27. Mesa electoral de voto por correo.

A Xunta electoral de cada federación deportiva designará unha mesa electoral do voto por correo que adecuará o seu funcionamento e obrigas ao disposto nos artigos 24 e 25 da presente orde coas seguintes peculiaridades:

- a) A súa sede será a da Secretaría Xeral para o Deporte.
- b) Se constituirá ás 16.00 horas do día seguinte hábil á data de celebración da votación presencial.
- c) Formará parte da mesa como un vogal máis da mesma un empregado público designado pola persoa responsable da Secretaría Xeral para o Deporte.

Sección 4ª. Da mesa electoral para a votación á presidencia de cada federación.

Artigo 28. Da mesa electoral para a votación á presidencia de cada federación.

1. A mesa electoral para a votación aos candidatos á presidencia de cada federación constituirase o día da votación e na sede da federación ou lugar que se determine no regulamento electoral.
2. A mesa electoral estará composta por tres membros: un presidente, un secretario e un vogal; elixidos por sorteo entre os membros da asemblea xeral, conforme o disposto no regulamento electoral.
3. Ostentarán a presidencia e a secretaría os membros de maior e menor idade desta mesa electoral, respectivamente. Así mesmo, e ata que conclúa a elección da presidencia da Federación deportiva, exercerán as funcións de presidente ou presidenta e secretario ou secretaria da asemblea xeral da federación.
4. Non poderán formar parte da mesa electoral regulada neste artigo os candidatos á presidencia da federación deportiva. A aceptación da condición de membro da mesa electoral implica a renuncia a presentar candidatura á presidencia da federación deportiva.
5. Unha vez constituídos todos os órganos reitores da federación entenderanse disoltas as mesas electorais.

Artigo 29. Das funcións da mesa electoral.

As funcións da mesa electoral para a votación á presidencia de cada federación serán as seguintes:



- Comprobar a identidade dos votantes.
- Comprobar os avais presentados polos distintos candidatos á presidencia da federación.
- Proclamar os candidatos á presidencia da federación.
- Recoller a papeleta de voto e depositala na urna pechada e preparada para os efectos.
- Proceder á contaxe de votos.
- Levantar acta dos votos emitidos, resultados e calquera outra incidencia, así como das reclamacións, se as houber, facendo constar o número de votos obtidos por cada candidato ou candidata.

Sección 5ª. Das actas das mesas electorais

Artigo 30. Das actas da mesa electoral.

1. A acta será subscrita por todos os membros da mesa electoral, así como polos interventores, se os houbera, e remitirase polo secretario, ao día seguinte das votacións á xunta electoral, que deberá garantir a súa exposición pública mediante a publicación no taboleiro de anuncios e na páxina web da federación.
2. Tamén será remitida polo secretario e no citado prazo, unha copia da acta das votacións á Secretaría Xeral para o Deporte que as publicará na súa páxina web.

Capítulo VII. Do sistema de elección a membros da asemblea xeral

Sección 1ª. Da votación a membros da asemblea xeral

Artigo 31. Das listas abertas.

O sistema de votación para participar no proceso electoral a membros da asemblea xeral responderá ao sistema de listaxes abertas.

Artigo 32. Da votación.

1. A votación realizarase en urnas separadas por estamentos e especialidades.
2. A votación desenvolverase sen interrupcións durante o horario que se fixe na súa convocatoria, que non poderá ser inferior a catro horas ininterrompidas. Soamente por causa de forza maior poderán non iniciarse ou interromperse as votacións. En caso de suspensión da votación non se terán en conta os votos emitidos nin se procederá ao seu escrutinio. Neste suposto, a xunta electoral fixará unha data para a nova votación.
3. O dereito a votar será acreditado pola inscrición no censo electoral definitivo. Para a súa identificación, o elector deberá presentar documento acreditativo da súa personalidade (DNI, pasaporte, tarxeta de residencia ou permiso de conducir con fotografía do titular). No caso das persoas xurídicas a representación corresponde exclusivamente á persoa que figura no censo electoral definitivo.
4. Os votantes poderán marcar na súa papeleta ata un candidato mais dos que lles corresponde elixir ao estamento e/ou circunscrición electoral á que pertence.



5. Se un membro electo da asemblea xeral perdese a condición pola cal foi elixido, causará baixa automaticamente naquela, e procederase á súa substitución co candidato non electo mais votado no seu estamento e circunscrición electoral.

Sección 2ª Dos membros da asemblea xeral

Artigo 33. Composición da asemblea xeral.

1. O número de membros da asemblea xeral fixarase no regulamento electoral da federación respectando o disposto nos estatutos federativos.

2. Os seus membros serán elixidos cada catro anos mediante sufraxio libre, igual, directo e secreto, salvo a singularidade prevista para o estamento de entidades deportivas, por e entre os compoñentes de cada estamento de conformidade co número e as porcentaxes de representación que se establecen nesta orde e que deberán singularizarse unha vez elaborado o censo electoral definitivo por estamentos.

3. Na asemblea xeral estarán representados todos os estamentos recoñecidos nos estatutos e integrados na federación e, cando menos, as entidades deportivas, os deportistas, os técnicos/adestradores, os xuíces/árbitros e , cando así este previsto nos respectivos estatutos federativos, outros colectivos interesados no ámbito deportivo.

4. A representación das entidades deportivas na asemblea xeral corresponde ao seu presidente ou presidenta ou á persoa que conforme os estatutos de cada entidade lle corresponda. Esta representación acreditarase fidedignamente mediante certificación do Rexistro de Entidades Deportivas de Galicia en que figuren expresamente os representantes legais da entidade.

5. Non cabe a representación das persoas físicas.

6. Ningún membro da asemblea poderá desempeñar unha dobre representación nesta.

7. O Presidente da Federación deportiva será membro nato da Asemblea xeral.

8. As federacións deportivas galegas axustarán, no posible, as súas actuacións ás recomendacións feitas pola Lei 7/2004, do 16 de xullo, galega para a igualdade de mulleres e homes.

Artigo 34. Proporcionalidade na composición da asemblea xeral.

1. O número de membros da Asemblea xeral determinarase, respectando o establecido nos estatutos, tendo en conta a necesidade de cumprimento dos criterios de composición contidos nesta orde.

2. As federacións con diferentes especialidades recoñecidas nos seus correspondentes estatutos deberán fixar dentro de cada especialidade a porcentaxe de representantes que corresponderá a cada unha delas, conforme ós seguintes criterios:

2.1. A representación de cada especialidade responderá a criterios de proporcionalidade ao número de clubs e ao número de licenzas. En calquera caso, todas e cada unha das especialidades recoñecidas terán cando menos un representante na asemblea xeral en cada estamento, sempre que o número establecido de membros de cada unha delas permita esta opción. Se non fora posible, aquelas especialidades cun número de licenzas de deportistas inferior ao 5% do total da federación só terán



un representante na asemblea xeral que corresponderá ao estamento de clubs deportivos e , no seu defecto, ao dos deportistas.

2.2. Á modalidade deportiva que fundamentou o recoñecemento como federación deportiva galega deberá garantírselle un mínimo do 51% de cada un dos estamentos que teña a federación correspondente. Nestes casos o número de compoñentes dos respectivos estamentos adecuarase a este criterio.

3. A porcentaxe de cada estamento fixarase de acordo coas seguintes proporcións:

a) Representantes de entidades deportivas: entre 40% e 70%.

b) Representantes de deportistas: entre 20% e 40%. Unha porcentaxe mínima do 10% dos representantes do estamento de deportistas deberá ser elixido por e de entre quen ostente a consideración de deportista galego de alto nivel na data de aprobación do censo provisional. Os/As deportistas de alto nivel que non desexen ser adscritos a este cupo deberán comunicalo expresamente á Xunta Electoral, e de non facelo serán encadrados no cupo reservado a deportistas galegos/as de alto nivel. Cando o número ou a porcentaxe de deportistas de alto nivel nunha Federación non permita cubrir as vacantes correspondentes a dito colectivo, estas serán cubertas polos restantes membros do estamento de deportistas.

c) Representantes de adestradores e técnicos: entre 5% e 20%.

d) Representantes de árbitros e xuíces: entre 5% e 10%.

e) Outros colectivos, se os houbera: ata o 5%.

4. Unha vez aprobados os censos electorais definitivos de cada un dos estamentos da respectiva federación, e tendo en conta o número de membros do estamento de entidades deportivas, a Xunta electoral fixará o número concreto de membros de cada estamento, segundo as porcentaxes e criterios establecidos no regulamento electoral. Esta decisión da Xunta electoral non é impugnabile e deberá ser notificada, no prazo de dous días, á Secretaría Xeral para o Deporte para a súa autorización ou modificación. A resolución da Secretaría Xeral para o Deporte porá fin á vía administrativa e contra ela poderase interpoñer recurso contencioso administrativo.

5. A conformación do estamento de clubs deberá seguir os seguintes criterios:

- Nas federacións en que o censo definitivo de entidades deportivas sexa inferior ou igual a 100, estarán representados no estamento de clubs un mínimo do 50% deles.

- Nas federacións en que o censo definitivo de entidades deportivas sexa superior a 100, estarán representados no estamento de clubs un mínimo de 50.

6. Cando debido ás peculiaridades dunha federación ou dunha especialidade deportiva non existan nela os estamentos de adestradores-técnicos e/ou de xuíces-árbitros, a totalidade da representación de cada un deles atribuirase aos demais estamentos en proporción á súa respectiva participación na asemblea xeral, efectuando a repartición de modo que non superen a porcentaxe máxima establecida.

7. As porcentaxes xerais atribuídas a cada un dos estamentos serán distribuídas proporcionalmente entre as distintas circunscricións electorais, de existir estas, en función do número de clubs (para o estamento de clubs) ou de persoas físicas (para o resto de estamentos) incluídos no censo electoral



definitivo, tendo en conta que cada circunscrición electoral deberá ter como mínimo un representante para cada estamento, sempre que o número de membros establecido para cada un deles o permite.

8. Cando o número de candidatos de calquera estamento coincida ou sexa inferior ao número de membros que hai que elixir non será necesaria a realización de eleccións polo que a ese estamento se refire, dando continuidade ao procedemento electoral.

Non obstante, no caso de que nalgún estamento da asemblea, e tras proceder como se establece no artigo 32.5 desta orde, houberse máis dun 20% de vacantes, o presidente ou presidenta procederá, no prazo máximo de 3 meses dende que se produza dita situación, á convocatoria parcial de eleccións para cubrir as vacantes, sen que esta nova convocatoria parcial afecte ós xa elixidos.

Sección 3ª. Das candidaturas

Artigo 35. Candidatos a membros electos da asemblea xeral.

1. Poderá ser candidato a membro da asemblea xeral toda persoa física ou xurídica incluída no censo definitivo que o solicite persoalmente, por correo certificado ou por calquera outro medio que acredite fidedignamente en dereito a dita solicitude, ante a xunta electoral. Para a solicitude establecerase un prazo que non será inferior a tres nin superior a sete días contados desde a publicación do censo definitivo.

2. Unha vez presentadas as candidaturas, a xunta electoral proclamará a lista provisional de candidatos e faraa pública no taboleiro de anuncios da federacións e das delegacións provinciais, de selo caso, na páxina web da federación na sección “procesos electorais” ou, no caso de que non a tivese, na páxina web da Secretaría Xeral para o Deporte.

3. Poderán formularse reclamacións contra a lista provisional de candidatos no prazo, non inferior a 3 días, ante a xunta electoral, que disporá de idéntico prazo para resolver.

4. Contra a resolución da Xunta Electoral poderá interpoñerse, no prazo de 3 días, recurso ante o Comité Galego de Xustiza Deportiva.

5. A proclamación definitiva de candidatos efectuarase de conformidade co procedemento e prazos que se establezan no regulamento electoral, e contra ela non caberá recurso.

Sección 4ª. Proclamación de membros da asemblea xeral

Artigo 36. Proclamación das persoas electas.

1. Unha vez realizado o escrutinio do voto por correo, este remitirase á xunta electoral que proclamará provisionalmente as persoas que formarán parte da asemblea xeral.

2. Contra o acordo de proclamación provisional efectuado pola xunta electoral, poderá presentarse recurso ante o Comité Galego de Xustiza Deportiva no prazo de dous días que deberá resolver nun prazo de tres días.

3. Finalizado o prazo para a interposición dos recursos ou, se é o caso, resoltos estes recursos administrativos, a proclamación de candidatos electos elevarase a definitiva.



4. Os candidatos que non resultaran electos conformarán unha listaxe ordenada de maior a menor número de votos por circunscricións e estamentos e cubrirán as vacantes que se produzan na asemblea xeral durante o mandato electoral.

5. No caso de renuncia ou vacante da metade mais un dos membros da asemblea xeral, constituirase unha comisión xestora conforme á composición establecida nesta orde, que asumirá as funcións da asemblea xeral ata o remate do mandato electoral.

Capítulo VIII. Elección do/a presidente da federación.

Artigo 37. Constitución da asemblea xeral.

1. As persoas electas como vogais da asemblea xeral tomarán, do xeito establecido regulamentariamente, posesión do seu cargo antes da súa sesión constitutiva que terá lugar na sede da federación, ou na sede establecida no regulamento electoral, no prazo máximo de cinco días desde a súa proclamación definitiva.

2. A sesión constitutiva da asemblea xeral será presidida pola mesa que se constituía conforme ao disposto no artigo 28 desta orde

Artigo 38. Elección do presidente da federación.

1. No pleno da sesión constitutiva da asemblea xeral iníciase o procedemento de elección do presidente da federación.

2. O voto dos vogais da asemblea xeral será único, persoal, directo e secreto, non admitíndose o voto por correo nin a delegación de voto.

3. Os candidatos a presidente deberán presentar as súas candidaturas avaladas polo 10% dos vogais da asemblea xeral; un vogal poderá avalar cantos candidatos considere oportunos.

4. A mesa electoral procederá a comprobar a validez dos avais presentados por cada candidato e, a continuación proclamará as candidaturas que cumpran os requisitos para ser elixible.

5. Os candidatos a presidente deberán presentar as súas candidaturas ao pleno da asemblea xeral e disporán dun tempo suficiente para a súa defensa. No caso de que se presentase un só candidato, non se efectuará votación.

6. Se non se presentase ningunha candidatura ou non fose válida ningunha das presentadas realizarase unha nova convocatoria da asemblea xeral nun prazo nin inferior a sete días nin superior a catorce días naturais. Se nesta segunda convocatoria non se presentase ningunha candidatura ou non fose válida ningunha das presentadas, a comisión xestora administrará a federación e convocará e realizará novas eleccións a presidente no prazo máximo de 3 meses.

7. Unha vez presentadas a totalidade das candidaturas iníciase o proceso de votación.

8. Na primeira votación son elixibles todos os candidatos da listaxe definitiva. Aqueles que obteñan un mínimo do 10% dos votos dos membros presentes pasarán á seguinte votación. No suposto de que ningún candidato acade o 10% dos votos pasarán á seguinte votación aqueles dous candidatos que contén cun maior número de votos. No suposto en que soamente sexa un candidato o que obteña o 10% dos votos, pasará tamén á seguinte votación o seguinte candidato en número de votos. De



acadarse por algún candidato a maioría absoluta dos votos, nesa primeira votación, será proclamado presidente.

9. Na segunda votación soamente serán elixibles aqueles que, como xa está exposto e coas excepcións establecidas, obtivesen polo menos o 10% dos votos emitidos. Será elixido presidente o candidato que nesta fase obteña a maioría absoluta dos votos.

10. No caso de que na votación anterior ningún candidato obteña a maioría dos votos emitidos, procederase a unha terceira nova votación entre os dous máis votados na segunda votación, no prazo establecido no regulamento electoral, e resultará elixido o que obteña maioría de votos. Para o caso de empate, resolverase a favor do/da de maior antigüidade na federación e no caso de persistir o empate, a favor do/da de maior idade.

11. Rematada a elección a presidente/a, o/a secretario/a da mesa levantará a acta correspondente, que se expoñerá ao día seguinte no taboleiro de anuncios da federación. Contra a resolución da xunta electoral caberá interpoñer, no prazo de tres días, recurso ante o Comité de Xustiza Deportiva.

12. Finalizado o prazo de reclamacións, recursos e da súa resolución, a xunta electoral procederá á proclamación definitiva do cargo de presidente/a da federación deportiva.

13. Ao día seguinte da proclamación definitiva do cargo de presidente/a da federación deportiva, procederase á toma de posesión deste/a no seu cargo, da cal levantará acta o/a secretario/a da xunta electoral. Unha copia desta acta será remitida á Secretaría Xeral para o Deporte no prazo de dous días.

Capítulo IX. Da xornada electoral

Sección 1ª. Do exercicio do voto presencial

Artigo 39. Constitución da mesa electoral.

1. As persoas designadas como membros da mesa electoral para a votación a candidatos da asemblea xeral e os seus suplentes e da mesa electoral para a votación á presidencia de cada federación, reuniranse o día das votacións unha hora antes da apertura do colexio electoral e procederán á constitución da dita mesa.

2. Se o presidente ou os vogais non acoden serán substituídos polos seus suplentes.

3. En ningún caso se poderá constituír a mesa electoral sen a presenza do presidente e do secretario da mesa.

4. No caso de ausencia do presidente ou do secretario, os membros da mesa presentes e os suplentes que acodan redactarán e asinarán unha declaración dos feitos acontecidos, e asumirán a función de presidente ou secretario, completando a mesa, no seu caso, cos electores que estean presentes no local.

5. Transcorrida media hora desde a constitución da mesa electoral, o secretario redactará a acta de constitución, que será asinada polo presidente e os vogais.

6. A mesa electoral deberá dispoñer dun censo electoral definitivo para cada un dos membros da mesa, no que figurarán dúas listaxes, unha dos electores que poderán exercer o seu voto



presencialmente e outro cos electores que tiveran solicitado o exercicio do voto por correo, que non poderán votar presencialmente en ningún caso.

Artigo 40. Das votacións.

1. Constituída a mesa electoral e na hora prevista o presidente da mesa electoral anunciará publicamente o inicio das votacións.
2. Unha vez iniciado o acto de votación non se poderá suspender, agás causa de forza maior e sempre baixo a responsabilidade do presidente da mesa electoral. No caso de suspensión, levantarase a correspondente acta, que será remitida no prazo das vinte e catro horas seguintes á xunta electoral, a fin de que sinale a data en que se repetira o acto de votación.
3. O dereito a votar será acreditado pola inscrición do elector no censo electoral, non podendo exercer o voto presencial aqueles electores que tiveran solicitado o voto por correo.
4. No caso das persoas xurídicas inscritas, o votante será a propia persoa xurídica, que figurará no censo personificada polo seu representante legal.
5. O secretario da mesa electoral anotará os electores que voten, con indicación do número co cal figure o elector no censo, así como o seu DNI, pasaporte ou carné de conducir xunto coa representación con que exerce o seu dereito a voto, se se trata dunha persoa xurídica.
6. O voto será secreto e os electores depositarán o seu voto na urna correspondente mediante unha papeleta introducida nun sobre.
7. O presidente da mesa electoral será o encargado de velar para que a entrada ao local das votacións sexa libre, de manter a orde nel durante a votación e escrutinio e de asegurar a liberdade dos electores no colexio electoral.
8. O presidente da mesa electoral, logo de consulta co resto dos compoñentes da mesa, poderá expulsar do colexio electoral calquera persoa que interfira a boa marcha das votacións.
9. Rematado o período sinalado para a votación, o presidente da mesa electoral anunciará que vai rematar e preguntará se algún dos electores presentes non votou, admitíndose os votos que se dean a continuación e non se permitirá a ninguén máis a entrada no local.
10. Acto seguido, votarán as persoas membros da mesa, sempre que teñan dereito, e declararase pechada a votación.
11. No caso de rematar o exercicio do voto da totalidade dos electores que figuren no censo, o presidente da mesa electoral dará por finalizada a xornada electoral e poderá iniciar o proceso de escrutinio de votos.

Artigo 41. Escrutinio.

1. Declarada pechada a votación comezará inmediatamente o escrutinio, función que corresponde exclusivamente á mesa electoral.
2. O presidente procederá ao escrutinio das papeletas en voz alta, unha a unha, exhibindo cada papeleta ás persoas presentes e anotándose o voto correspondente a cada persoa candidata.



3. Concluído o escrutinio, que non poderá ser interrompido, estenderase a oportuna acta asinada por todos os compoñentes da mesa electoral.

4. Son nulos os votos emitidos en papeleta ou sobre de modelos distintos dos facilitados pola xunta electoral; as papeletas que teñan riscadas; os votos en que, por calquera razón, non se poida determinar inequivocamente a candidatura elixida; aqueles votos en que se marquen máis nomes dos establecidos no regulamento electoral para cada estamento ou inclúan o nome de persoas non candidatas. No caso de conter máis dunha papeleta coas mesmas candidaturas marcadas, computarase como un só voto válido, para este caso se as candidaturas marcadas son diferentes deberá computarse como voto nulo. As papeletas deberán conservarse para o caso de que se faga algunha reclamación sobre elas.

5. Consideraranse votos en branco aqueles sobres que non conteñan ningunha papeleta e aqueles sobres que conteñan papeletas que non presenten ningunha marca.

6. Feito o recuento de votos segundo as operacións anteriores, quen exerza a presidencia preguntará se hai algunha protesta que facer contra o escrutinio. Se non se formulan, ou despois de resoltas pola maioría da mesa, o presidente anunciará en voz alta o resultado, especificando o número de votantes, o de votos válidos, nulos, de votos en branco e de votos obtidos por cada candidatura.

7. Concluídas as operacións, os membros da mesa asinarán a acta da sesión, na que figurarán, obrigatoriamente, os seguintes datos:

- a) Número de electores/as inscritos no censo.
- b) Número de votos emitidos.
- c) Votos declarados nulos, en branco e válidos.
- d) Número de votos válidos obtidos por cada candidato.
- e) Observacións presentadas ante a mesa electoral sobre a votación e o escrutinio polos candidatos, interventores e electores.
- f) Resolucións motivadas da mesa electoral sobre as observacións presentadas e votos particulares.

8. As actas correspondentes aos resultados das votacións e o censo electoral no que conste os electores que exerceron o seu dereito a voto, serán remitidas polo secretario á xunta electoral e á Secretaría Xeral para o Deporte antes da 16:00 horas do día seguinte ao da votación

9. As actas de escrutinio serán expostas no taboleiro de anuncios da federación desde o día seguinte das votacións e durante dous días.

Artigo 42. Documentación electoral

1. A mesa electoral preparará a documentación electoral que distribuirá en dous sobres.
2. O primeiro sobre conterá o expediente electoral, composto polos seguintes documentos:
 - a) Orixinal da acta de constitución da mesa electoral.
 - b) Lista do censo electoral.



c) Lista numerada dos votantes e das papeletas ás cales se lles negase validez ou fosen obxecto dalgunha reclamación.

d) Acta de escrutinio.

3. O segundo sobre conterá copia da documentación anteriormente citada.

4. Unha vez pechados os sobres, o presidente e os vogais asinaranos por riba das lapelas que os pechan e serán remitidos, dentro das vinte e catro horas seguintes, á xunta electoral, e a secretaría xeral para o Deporte.

Sección 2ª Do exercicio do voto por correspondencia

Artigo 43. Do voto por correspondencia.

1. Unicamente se admitirá o voto por correo nas votacións para membros da asemblea xeral naqueles estamentos integrados por persoas físicas.

2. En ningún caso os electores que solicitaran o exercicio do dereito a voto por correo poderá emitir o voto de forma presencial.

3. Os/as electores/as poderán emitir o seu voto por correo, de conformidade co seguinte procedemento:

a) A persoa electora solicitará por escrito o seu dereito ao voto por correo á xunta electoral interesando a súa inclusión no censo especial de voto por correo. Dita solicitude deberá realizarse a partir do día seguinte ao da convocatoria das eleccións e ata cinco días despois da publicación do censo definitivo, cumprimentando o documento normalizado que se axustará ao anexo I da presente orde. Diariamente a Xunta electoral remitirá electronicamente á Secretaría Xeral para o Deporte un listado nominal coas solicitudes de voto por correo solicitadas o día anterior. Non poderán incluírse no censo de persoas con dereito a exercer o voto por correo aqueles electores que non figurasen nos listados nominais, incluído o listado do último día de prazo para solicitalo remitido á Secretaría Xeral para o Deporte.

b) A solicitude presentárase persoalmente, exhibindo o DNI, pasaporte ou autorización de residencia ante o secretario da federación quen a trasladará á xunta electoral.

c) No caso de enfermidade ou incapacidade que impida a presentación persoal da solicitude, poderá efectuarse mediante representante para o efecto, acreditando a súa identidade así como a representación mediante documento autenticado por notario.

d) Recibida a solicitude, a xunta electoral comprobará a inscrición do solicitante no censo electoral.

e) O censo de persoas autorizadas para o exercicio do voto por correo deberase remitir á Secretaría Xeral para o Deporte, e publicárase ademais nas páxinas web das respectivas federacións, e na páxina web da Secretaría Xeral para o Deporte no caso de que estas non dispuxesen deste servizo.

f) A xunta electoral enviará á persoa electora por correo certificado os sobres electorais e as papeletas de todas as candidaturas, así como a documentación necesaria, ao domicilio indicado na súa solicitude ou no seu defecto ao que figure no censo.



g) A persoa electora introducirá a papeleta no sobre de votación do estamento e, no seu caso, especialidade deportiva a que pertenza. Posteriormente, este sobre introdúcese dentro do que vai dirixido á mesa electoral, xunto coa fotocopia do DNI ou permiso equivalente.

h) A presentación dos votos nas oficinas de correos deberá realizarse con 6 días hábiles de antelación á data de realización das eleccións, mediante envío por correo certificado e non serán admitidos os sobres depositados con data posterior, debendo indicar no enderezo que vai dirixido á Secretaría Xeral para o Deporte que custodiará esta documentación ata o día da votación.

4. O prazo límite para recibir os votos por correo finalizará vinte e catro horas antes das votacións presenciais.

Artigo 44. Escrutinio do voto por correo.

1. Constituída a mesa, nas condicións establecidas no artigo 40, o presidente procederá ao desprecintado das sacas e procederase á comprobación da correspondencia entre os sobres e o censo electoral.

2. Unha vez comprobado, os membros da mesa procederan a abrir o sobre principal e a clasificar os sobres por estamentos e circunscricións, procedendo o presidente de seguido a introducilos na urna correspondente.

3. Unha vez finaliza a introdución dos sobres nas urnas, comezará inmediatamente o escrutinio, función que corresponde exclusivamente á mesa electoral.

4. O presidente procederá ao escrutinio das papeletas en voz alta, unha a unha, exhibindo cada papeleta ás persoas presentes e anotándose o voto correspondente a cada persoa candidata.

5. Concluído o escrutinio, que non poderá ser interrompido, estenderase a oportuna acta asinada por todos os compoñentes da mesa electoral.

6. Son nulos os votos emitidos en papeleta ou sobre de modelos distintos dos facilitados pola xunta electoral; as papeletas que teñan riscadas; os votos en que, por calquera razón, non se poida determinar inequivocamente a candidatura elixida; aqueles votos en que se marquen máis nomes dos establecidos no regulamento electoral para cada estamento ou inclúan o nome de persoas non candidatas. No caso de conter máis dunha papeleta coas mesmas candidaturas marcadas, computarase como un só voto válido, para este caso se as candidaturas marcadas son diferentes deberá computarse como voto nulo. As papeletas deberán conservarse para o caso de que se faga algunha reclamación sobre elas.

7. Consideraranse votos en branco aqueles sobres que non conteñan ningunha papeleta e aqueles sobres que conteñan papeletas que non presenten ningunha marca.

8. Feito o recuento de votos segundo as operacións anteriores, quen exerza a presidencia preguntará se hai algunha protesta que facer contra o escrutinio. Se non se formulan, ou despois de resoltas pola maioría da mesa, o presidente anunciará en voz alta o resultado, especificando o número de votantes, o de votos válidos, nulos, de votos en branco e de votos obtidos por cada candidatura.



9. Concluídas as operacións, os membros da mesa asinarán a acta da sesión, na que figurarán, obrigatoriamente, os seguintes datos:

- a) Número de electores/as inscritos no censo de voto por correo.
- b) Número de votos emitidos.
- c) Votos declarados nulos, en branco e válidos.
- d) Número de votos válidos obtidos por cada candidato.
- e) Observacións presentadas ante a mesa electoral sobre a votación e o escrutinio polos candidatos ou interventores.
- f) Resolucións motivadas da mesa electoral sobre as observacións presentadas e votos particulares.

10. As actas correspondentes aos resultados das votacións e o censo electoral no que conste os electores que exerceron o seu dereito a voto por correo, serán remitidas polo secretario á xunta electoral e á Secretaría Xeral para o Deporte antes da 16:00 horas do día primeiro día hábil seguinte ao da votación

11. As actas de escrutinio serán expostas no taboleiro de anuncios da federación desde o día seguinte das votacións e durante dous días.

Artigo 45. Documentación electoral.

1. A mesa electoral preparará a documentación electoral que distribuirá en dous sobres.
2. O primeiro sobre conterá o expediente electoral, composto polos seguintes documentos:
 - a) Orixinal da acta de constitución da mesa electoral.
 - b) Lista do censo electoral de voto por correspondencia.
 - c) Lista numerada dos votantes e das papeletas ás cales se lles negase validez ou fosen obxecto dalgunha reclamación.
 - d) Acta de escrutinio.
3. O segundo sobre conterá copia da documentación anteriormente citada.
4. Unha vez pechados os sobres, o presidente e os vogais asinaranos por riba das lapelas que os pechan e serán remitidos, dentro das vinte e catro horas seguintes, á xunta electoral, e a secretaria xeral para o Deporte.

Capítulo X. Da moción de censura

Artigo 46 Moción de censura.

A presentación dunha moción de censura contra o Presidente dunha Federación deportiva galega axustarase ós seguintes criterios:



- a) Non poderá presentarse durante os seis primeiros meses de mandato, nin cando resten entre seis meses e un ano ata a data a partires da cal poida realizarse a convocatoria de eleccións, circunstancia a determinar polas normas da Federación.
- b) A moción de censura deberá ser proposta e presentada, alomenos, pola terceira parte dos membros da Asemblea Xeral e incluíra necesariamente un candidato á Presidencia da Federación.
- c) A presentación da moción de censura dirixirase á Xunta Electoral federativa, que deberá resolver o que proceda no prazo de dous días hábiles.
- d) Cando se acorde a admisión a trámite da moción de censura, o Presidente da Federación deberá convocar a Asemblea Xeral nun prazo non superior a corenta e oito horas, a contar desde que lle sexa notificada a admisión. A Asemblea Xeral que debata sobre a moción de censura deberá celebrarse nun prazo non inferior a quince días nin superior a trinta días, a contar desde que fora convocada.
- e) Unha vez convocada a Asemblea Extraordinaria para o debate e votación da moción de censura, e dentro dos dez primeiros días seguintes a esa convocatoria, poderán presentarse mocións alternativas. En ningún caso a moción de censura alternativa poderá ser subscrita por quen promovera a inicial.
- f) A votación, que deberá ser secreta, seguirá o mesmo sistema que o previsto para a elección de Presidente. Para que a moción de censura prospere e cese de forma automática o Presidente, se requirirá que, sometida a votación, sexa aprobada pola maioría absoluta dos membros da Asemblea Xeral.
- Se a moción de censura fora aprobada, o candidato elixido permanecerá no cargo polo tempo que restase ata a finalización do período de mandato do anterior Presidente.
- g) Se a moción fora rexeitada pola Asemblea Xeral os seus signatarios non poderán presentar outra ata transcorrido un ano, a contar desde o día da súa votación e rexeitamento.
- h) Informarase a través da páxina web da Federación da presentación da moción de censura e da data da convocatoria da Asemblea Xeral, así como do resultado.
- i) As decisións que adopten os órganos federativos en relación coa presentación, admisión, tramitación e votación de mocións de censura, ou de mocións alternativas, poderán recorrerse ante o Comité Galego de Xustiza Deportiva no prazo de cinco días hábiles.

Capítulo XI. Da Comisión delegada.

Artigo 47. Elección da Comisión Delegada.

1. No caso de estar prevista nos Estatutos, o regulamento electoral deberá regular expresamente o sistema de elección dos membros deste órgano respectando o disposto nos seguintes apartados.
2. Os membros da Comisión Delegada elíxense por e entre os membros da Asemblea Xeral, mediante sufraxio igual, libre, directo y secreto, poidendo substituírse anualmente, polo mesmo procedemento, as vacantes que se produzan. O voto por correo non poderá utilizarse en ningún caso para a elección dos membros da Comisión Delegada.



3. O número máximo de membros que compoñen a Comisión Delegada será de 12, máis o Presidente, que pertence á mesma como membro nato. En todo caso, deberá gardarse a seguinte proporción:

- Un terzo da Comisión Delegada debe ser designado polo Presidente da Federación.
- Un terzo debe corresponder ás entidades deportivas, elixíndose esta representación por e de entre os mesmos.
- Un terzo corresponderá aos demais estamentos, en proporción a súa respectiva representación na Asemblea Xeral.

Capítulo XII. Do réxime de reclamacións e recursos

Artigo 48. Reclamacións ante a xunta electoral.

1. O coñecemento de todas as reclamacións previstas nesta orde e que se poidan formular na materia electoral corresponde á xunta electoral, e serán todas as súas resolucións impugnables ante o Comité Galego de Xustiza Deportiva.

2. Están lexitimados para interpoñer estas reclamacións os representantes das candidaturas ou as persoas ou entidades debidamente afectadas polos acordos da xunta electoral.

3. As reclamacións ante a xunta electoral serán presentadas, persoalmente ou por calquera medio que acredite fidedignamente en dereito a presentación do escrito (burofax, correo certificado, telegrama...), na sede federativa mediante escrito dirixido ao presidente da xunta electoral.

4. Os prazos para a presentación destes recursos, así como os de resolución da xunta electoral, serán os fixados no regulamento electoral, e respectaranse en todo caso os establecidos nesta norma.

Artigo 49. Comité Galego de Xustiza Deportiva.

De acordo co disposto no artigo 88 da Lei 3/2012, de 2 de abril, do deporte de Galicia, correspóndelle ao Comité Galego de Xustiza Deportiva o coñecemento e a resolución dos recursos que nos seus procesos electorais adopten as federacións deportivas, podendo adoptar, no ámbito das súas competencias, as medidas que sexan necesarias para garantir a legalidade dos procesos electorais.

Artigo 50. Recurso ante o Comité Galego de Xustiza Deportiva.

1. Contra os acordos e resolucións das xuntas electorais procederá recurso electoral ante o Comité Galego de Xustiza Deportiva, e as resolucións deste poñerán fin á vía administrativa.

2. Están lexitimados para interpoñer este recurso electoral quen fose parte na impugnación ante a xunta electoral federativa ou as persoas interesadas directamente polo seu acordo ou resolución.

3. O prazo para a interposición do recurso electoral ante o Comité Galego de Xustiza Deportiva será de tres días hábiles contados dende o seguinte ao da notificación da resolución ou acordo obxecto de recurso ou, se for o caso, dende o momento en que se produza a desestimación tácita da reclamación electoral presentada.

4. O escrito de interposición do recurso deberá expresar:



- a) O nome, DNI e domicilio da persoa física ou denominación e enderezo social dos entes asociativos interesados, incluíndo neste último caso o nome do seu representante legal.
- b) Se é o caso, o nome, DNI e enderezo do representante do interesado, que poderá acreditar a súa representación, ademais de polos medios legais procedentes, a través de comparecencia ante a Secretaría do Comité Galego de Xustiza Deportiva.
- c) A lexitimación para interpoñer o recurso.
- d) O acto contra o que se recorre e a razón da súa impugnación.
- e) As consideracións de feito e de dereito en que baseen as súas pretensións, así como as propostas de proba que ofrezan en relación con aquelas.
- f) As pretensións que deduzan de tales consideracións.
- g) Lugar, data e sinatura.

5 O Comité Galego de Xustiza Deportiva será competente para coñecer, en última instancia administrativa, dos recursos interpostos contra:

- a) O acordo de convocatoria das eleccións, así como contra o calendario electoral e fronte a composición da Xunta electoral.
- b) As resolucións que se adopten en relación con o censo electoral provisional e definitivo.
- c) As resolucións adoptadas durante o proceso electoral polas Comisións Xestoras e as Xuntas electorais das Federacións deportivas en relación co proceso electoral e as restantes cuestións previstas na presente Orden.

Artigo 51. Interposición dos recursos.

Os recursos dirixidos ó Comité Galego de Xustiza Deportiva deberán presentarse nos órganos federativos ou Xuntas Electorais que, no seu caso, adoptaran as actuacións, acordos ou resolucións que se pretenden impugnar ou nos lugares previstos no artigo 44 do Decreto 120/2013 de 24 de xullo, polo que se aproba o regulamento do Comité Galego de Xustiza Deportiva. Transcorrido o prazo correspondente sen que se interpuxera o recurso, os acordos ou resolucións serán firmes.

Artigo 52. Tramitación dos recursos.

Á tramitación dos recursos atribuídos ao coñecemento do Comité Galego de Xustiza Deportiva aplicaráselle a lexislación sobre procedemento administrativo común e o Decreto 120/2013 de 24 de xullo, polo que se aproba o regulamento do Comité Galego de Xustiza Deportiva .

Artigo 53. Incumprimento das disposicións da orde.

O incumprimento das disposicións establecidas nesta orde dará lugar á aplicación das sancións establecidas no título VII da Lei 3/2012, do 2 de abril, do deporte de Galicia.

Disposición adicional primeira. Período inhábil para eleccións.

Aos solos efectos da celebración de votacións considerarase o mes de agosto e os venres, sábados e domingos como período inhábil, agás os venres para o voto por correo.



Disposición adicional segunda. Incompatibilidade de celebración de eleccións e de competicións.

O día de celebración das votacións a membros da Asemblea Xeral, no seu caso á Comisión Delegada e á Presidencia da Federación serán inhábiles a efectos de celebración de probas ou competicións deportivas de carácter oficial con participación de clubs e/ou deportistas galegos, na modalidade deportiva correspondente.

Non se poderá determinar como día de eleccións aqueles nos que no momento de elaboración do calendario electoral se teña constancia da celebración dunha proba de carácter nacional ou internacional na comunidade autónoma.

Co obxecto de facilitar a participación nos procesos electorais os clubs e as federacións deportivas procurarán non planificar adestramentos no horario de votación. En ningún caso poderá ser obxecto de sanción nin polo club nin pola federación aquel deportista, adestrador ou xuíz que faltara ao adestramento por exercer o seu dereito ao voto.

Disposición adicional terceira. Uso de medios electrónicos.

Os membros da xunta electoral poderán ser validamente convocados para que a sesión se celebre en varios lugares simultaneamente sempre que os medios técnicos permitan o normal desenvolvemento da sesión e o respecto dos dereitos dos membros. Unha vez constituído o órgano, a persoa que exerza a súa presidencia designará, para cada un dos lugares onde non se atope fisicamente o/a secretario/a, un dos membros asistentes para que o auxilie nas súas funcións.

Disposición adicional cuarta. Do xénero.

Todas as mencións xenéricas en masculino ou feminino que aparecen no articulado desta norma deben entenderse referidas ao seu correspondente feminino ou masculino.

Disposición derogatoria primeira

Queda derogada a Orde do 8 de setembro de 2010 pola que se establecen os criterios para a elaboración de regulamentos e a realización dos procesos electorais nas federacións deportivas galegas.

Disposición derogatoria segunda. Cláusula derogatoria xeral

Quedan derogadas cantas normas de igual ou inferior rango se opoñan ao establecido no presente decreto.

Disposición derradeira primeira. Habilitación para o desenvolvemento desta orde

Facúltase a Secretaría Xeral para o Deporte para adoptar os acordos e ditar as resolucións que considere oportunas no desenvolvemento desta orde.

Disposición derradeira segunda. Publicación e entrada en vigor.

Esta orde entrará en vigor o día da súa publicación no Diario Oficial de Galicia.



ANEXO I

Modelo de papeletas e sobres de votación

a) Sobre de votación

ELECCIÓN Á ASEMBLEA XERAL DA FEDERACIÓN GALEGA

ESTAMENTO DE

ESPECIALIDADE DE (no seu caso).....

CIRCUNSCRICIÓN

Mesa Electoral

Indíquese, cando corresponda, si o elector está incluído en algún dos seguintes supostos:

- Estamento de deportistas: deportista cualificado como deportista **(galego/estatal)** de alto nivel.

b) Sobre para a remisión do voto por correo

Anverso:

FEDERACIÓN DEPORTIVA GALEGA DE.....

Enderezo:

Eleccións á Asemblea Xeral da Federación Galega.....

Reverso:

Nome:.....

Apelidos:.....

Estamento de

Circunscrición:.....



Especialidade de (no seu caso)

Deportista de alto nivel

c) Solicitud interesando a inclusión no censo especial de voto por correspondencia

(Nome e apelidos), con DNI n.º, y n.º de licencia....., pertencente ó estamento de na especialidade deportiva de, pola presente formula solicitud de acordo co artigo 44 da Orde pola que se establecen as bases e os criterios para a elaboración dos regulamentos electorias que deben rexer a realización dos procesos electorais nas federacións deportivas galegas, pola que SOLICITA

Que se admita o presente escrito xunto coa documentación que se achega (fotocopia do DNI, pasaporte o residencia e da lizeza deportiva) e, tralos trámites oportunos, se me inclúa no censo especial de voto por correspondencia da Federación Galega de

En,....., a, de, de 20.....

Asinar:

Á XUNTA ELECTORAL DA FEDERACIÓN GALEGA DE.....

d) Papeleta de votación

VOTACIÓN PARA A ELECCIÓN DOS REPRESENTANTES NA ASEMBLEA XERAL DA FEDERACIÓN GALEGA DE

Especialidade (no seu caso):

Circunscrición:.....

Estamento:

Dou meu voto aos seguintes candidatos:

1.....	26.....
2.....	27.....
3.....	28.....
4.....	29.....
5.....	30.....
6.....	31.....
7.....	32.....



8.....	33.....
9.....	34.....
10.....	35.....
11.....	36.....
12.....	37.....
13.....	38.....
14.....	39.....
15.....	40.....
16.....	41.....
17.....	42.....
18.....	43.....
19.....	44.....
20.....	45.....
21.....	46.....
22.....	47.....
23.....	48.....
24.....	49.....
25.....	50.....